

## Petoroac Kibi 2

<sup>1</sup> Ni Simong Petoro, Yesu Kristoac wanacngic nga aposorongo kibi yomoc ohongemmeduae. Nenang Anutu nga memengerecnina Yesu Kristo, yeri dindingac, imocac amma nenang negen negensinggac nadunga mocgu meficgenemmeoc. Imoc wiac engena yombong.

<sup>2</sup> Anu ngeni Anutu nga Kebunina Yesu hafoan-goc negengyemecmagec yereac danggunuc nga ruae, imocngo ngenearu sahema febeso.

<sup>3</sup> Anutungo Kristoac dedengerec nga yeac kuc nga kibikperagiau kecnideac kpacnunuec. Nenang ye negemmini Anutungo hama yengena kucfu kekec nga yeac sing modacnideac kuc sa-sawa nemmeec.

<sup>4</sup> Bangecac songo imocngo faka dzonggo dzong-goya meficgeude. Nga ngeni Anutuac kekecfu torokpema bangecac songo imoc wagecdeac Anutungo Kristoac kuc nga kibikperagia manau yoac dedzege engena angemmeec.

<sup>5</sup> Ngeni imocac amma efaima serima namma negen negensingnginango faka dindingac meficgebeso nga fakangina dindingacngo negen negentegec meficgebeso

<sup>6</sup> amma negen negentegecnginango garengeme kekec meficgebeso, garengeme kekecngo seserigoc kekec meficgebeso nga seserigoc kekecngo Anutuac enac tofoc tofoho meficgebeso,

<sup>7</sup> Anutuac enac tofoc tofohongo dacmunac heresongogoc hoangeme kekec meficgebeso imocngo heresongo meficgeude.

<sup>8</sup> Faka imoc sasawango ngenearu yadiseri amma fedacdeu ngeni ngisima kecma Kebunina Yesu Kristo hafoangoc negemmima kecgcede. Kecma kekec imocac fora gombunga homac fingecongemu mong mi obohogcede.

<sup>9</sup> Nga ngic mong ye kekec imoc mi femide, ye kicpisis nga hereausing naric mi hentegerude, sir- iha imocacsoc. Ye kopocsiha warac dzuac dzuara, imoc bic nigeckpeec.

<sup>10</sup> Tosofocna, ngeni Anutungo bic kpacn- gunuma meisingngunuec, ngeni mamangkima kufung tigeceude naric mi mangunuude.

<sup>11</sup> Ifi anggec yeni ubangerec angemmema Kebu nga memengerecnina Yesu Kristo yeac kekecse- riac eucererennu heitaingunugec enggecede.

<sup>12</sup> Ngeni yoac fora bic negemma mekecgcec imoc negenduae, amma sifu nasosoc yoac imoc heig- boringemmedeac negenduae.

<sup>13-14</sup> Amma sebinaac bedzo yomoc hesibadeac nasoya wegenede, Kebunina Yesu Kristongo imoc bic dekperaginene. Imocac sebinaac bedzogoc kecbade, imohai yoac goa heigboringemmema midingunubadeac negemba naric ande.

<sup>15</sup> Amma ni ua imoc nasosoc mamangkima mekecduae. Mekecma homeba, yoac imoc mi nigecongunuude.

<sup>16</sup> Neni Kebunina Yesu Kristoac kuc nga ha- hanasoac deing, imoc nemusiducgoc torokpeni songea anudeac mi deing. Neni yeac kuc nga

kibikperagia engena kicninango hemma negen-  
ingac hepuc amma yofi dedimbe,

<sup>17</sup> Anutu Manggacngo eweheihei nga kuc  
kibikperagia mimanu kuc kibikperagi engenatoa  
imocac manaunac enacudumengngo fingecma  
yeac yofi deec,

“Yomoc neac Songomedacna, ni ye hensongo am-  
miduae.” (*Mataio 17:5; Mareko 9:7; Ruka  
9:35*)

<sup>18</sup> Neni yegoc momoc tiki kpetiacfu nammina  
ubaudumeng imocngo kurumennunac fingeru  
negening.

<sup>19</sup> Ifi negemma, profete yeneng yoac ohogec,  
imoc nenannu seria fede. Imoc kifa mong  
isoc nga imoc amabangec kundung fede,  
imohai mekperagimanu ama wereckenu  
asoac asomengngo herenginau dzema  
mekperagingunuude, ngeni kicngina ihacgeng  
fima hoanggegec ngereeude.

<sup>20</sup> Nga profete yeneac yoac sasawa mitikibiu  
oho ohoya fede, imoc yeni yenang ubanginaac  
yoac mong mi degec, kpac. Ngeni imoc negen-  
tegecbisia.

<sup>21</sup> Imoc yofiac, profeteyoac imoc ngic songou  
fingeru mi degec, imoc Anutuarunac nga Tiri  
Asungo imoc mehama enacnginau faiu degec.

## 2

<sup>1</sup> Warac ngicngac yeneac botucfu profete ikoha  
kecgec, ifi isocngoc kpoukpou ikoha ngeniac  
botucfu ifingoc kecgecde. Yeni dedesifuc yoac  
goa ikoha dema waic waic botucnginau mehama  
kekecngina memanganegecde. Nga Kebungo bic

bummeyunuec, ye ifingoc busic kpema yenaoc ebic witinginau faigec, imocngo bic memanganeyunuude.

<sup>2</sup> Kpoukpou ikoha yeni faka hania hania mangana gameagoc angkecgec ngicngac homacngo modacyunugec yeni imoc hemma yoac foraac sing deendema anggecde.

<sup>3</sup> Anu kpoukpou imoc yeni ngeneac dzofinac hensongo amma ikocyoac dema hodzinggema wangepngunugecde. Nga Anutungo faka ifia bicngoc ngadeheec amma yofinenggac yoacfu faiyunuma memanganeyunuude.

<sup>4</sup> Angero yeneng kopocsic meficgegec Anutungo mi onggongyunuma hofeac kundung seriau ukuyunuu kemegec. Kemegec ye ihai sengngo wicityunuu desidesi nasoac tomai kecdae.

<sup>5</sup> Nga Noaac nasou habutoa Anutuac yoac ferahgec mi onggongyunuec, kpac. Yeni ine dokudzohong deu erema semeyunuu homegec. Nga Noa ye faka dindingacac dedekperagingic, ye nga yegoc ngicngac seweng, yenisac onggongyunuec.

<sup>6</sup> Anu Sodong nga Gomora taong, yeri desiyuruma memanganeyururu hamangirasac feec. Nga ngicngac Anutuac sing kpema kecdae, yenearu kecma ifi isoc fingechesandeac ongea edzacyunuma ifi anec.

<sup>7</sup> Yeneng kaisero faka nga mangana hania hania amma Anutuac yoac kpegec, Roti ye ngic dindingacngo fakangina ifia hemma ubea ebiriu Anutungo onggonggeec.

<sup>8</sup> Ye ngic dindingacngo yeneac botucfu kefecac uamemesoc kopocsic faka angkecgec, imoc henu

ubahereango yeneac faka manganaac amma ebic mema modzotitiu kefec.

<sup>9</sup> Ngeni imoc hemma Kebuac sing yofi negenggede, ngicngac Anutu eweheimima yeac enac tofohoandae, yeneac faitobang fingecyem-meu Kebungo imohacnac onggongyunuudeac kuha fede. Nga fakangina manganagoc kecandae, yeni ine witicamau faiyunuu tacmagec yoacfu faiyunuudeac nasoya haude.

<sup>10</sup> Ngicngac yeni uba eseaac songo modacma faka seuhagoc hoanggeandae, ye yenearunoc ifi angkecde. Yeni Kebu ngadehema deendema amma yenang songo modacma kengeha kpac sawaac asu engena demanganeyunugecde.

<sup>11</sup> Anu angero kucngina monggoc yeni sifu Kebuac kicfu asu imoc mi demanganeyunugec.

<sup>12</sup> Yangkposi yeni momorongnginaac songo modacandae, yeni fingecgec eng yunuandimbe. Nga kpoukpou ikoha yeni yangkposi isoc momorongngina eng modacma wiac mi negendae, imoc demanganegecde. Amma yeni fakangina mangana modacgec Anutungo memanganeyunuude.

<sup>13</sup> Yeni faka mangana amma imocac turunga megecde. Yeni enackerec amma wenac dzongiau neneyakatoa homac negecdeac ayemmeude. Ayemmeu yeni ngenigoc yaka enacurec nema faka seuhagoc nga gameagoc mema sogaima kecandae.

<sup>14</sup> Ifi kecma kichodung faka homac amma ngac yeneac kickerec amma kopocsic gebeha kpac angkecdae. Amma ngicngac negen negensinggoc amma mi serigec, yeni faka manganau ker-

ereyunuma wangecyunugecde. Areng imocfia yeni sowecac nambaracfora.

<sup>15-16</sup> Bireang Beoroac medac, ye dzofinacac songo negemma Anutuac sing ferahema hiedzoac ua meu donggi yocac mi dedeango ngic isoc dehanec ammima profetengo sing segema faka kapaya amma kenghei hahei anecac kpae heimiec. Nga kpoukpou ikoha, yeneng Bireangac sing modacma sing dindingac wama sing segegecde.

<sup>17</sup> Yeni dokukiwa dzike dzikea nga hoeng murayowarec yereng kpema fifiranggeandape isoc. Anutungo yeneac tatac imoc kundung dzapac ihai deec.

<sup>18</sup> Ngicngac sing segeandae, yeneacunac bure mema woramagec kpoukpou ikohango enacdoku ayemmema yocac kuneng dema kaiseroac sing nga uba eseaac songou monggoc wangecyunugecde.

<sup>19</sup> Hofeac singngo kpoukpou ikoha wicityunude, yeni deandae, “Ngcngac yocacnina negenggecde, ngeni witicngina kpac anggecde.” ifi dema sing segeandae. Nocac wiac mongngo witicgude, ye kebuga anude.

<sup>20</sup> Nga yeni Kebunina nga memengerecnina Yesu Kristo negentegecma namma bangecac faka seuhagoc bic wagec, yeni monggoc kopocsicfu kenggec wicityunuu makpegecdeu ebictoanginagoc anggecde. Nga ebic imocngo warac ebicgoc kecgec, imoc feraheude.

<sup>21</sup> Ngic mong ye ubamereng amma Kebuac kpetiac singyoac mema sing dindingac negemma modacande, ye imohacnac monggoc dzigenema keema ebictoa meficgeude. Imocac yeni hana-

hema sing dindingac negenggec naso imohai mi hoanggebaungo ngereebac.

<sup>22</sup> Anu yoac heiheia mong yofi fede,

Kasingo urumma urung urunga imoc monggoc dzigenema neude. (*Yoac negen negengagoc 26:11*)

Nga berecngo doku nadzicmaguc monggoc goteng nadzirude.

Imocac fora imoc yeneac kekecfu fingerec.

### 3

<sup>1</sup> Songo tosofocna, ngeneac kibi andenga yohockang yomoc ohongemmeduae. Kibi yohockang imocngo ubanegen negengngina heigboriu negentegecma kongaha kecbisia.

<sup>2</sup> Profete kpetiac, yeneng wiac ngade fingerudeac yoac imoc bic ohogec. Nga Kebu memengerecninango singyoac aposorofora yemmeu yeneng ngenearu hama imoc edengunugec, imoc negenggec fedec monggoc heigboringemmeduae.

<sup>3</sup> Ngeni yofinoc negenghomebisia. Naso wisic wisickeau desusuic ngicngac goa yeneng fingecma yenang faka manganaac hereyacyac modacma desusuic angemmema

<sup>4</sup> degecde, “Haudeac edengunuec, ye damoc kecde? Anutungo hanac hanaheaunacngoc wiac sasawa deu fingerec nga mangesafocnina homegecfunac nang erekecma yaguc kecdimbe, imoc sasawa yeni warac feec isoc siriha mockicngoc fede.”

<sup>5</sup> Yeni ifi dema yoac yomoc wagecde, Anutungo bicngoc bicngoc yombong yoac deu sawa fingerec nga bangec dokuunac fingectegecma erema feec.

<sup>6</sup> Anu kecma ye dokungoc monggoc edeu yadima bangecfu wiac sasawa feec, imoc semeu manganema kpac andarec.

<sup>7</sup> Amma Anutungo yoac monggoc dema, bangec yomoc nga wiac sasawa sawau yofinenggac fedacde, imoc faiyunuu gerecac tomai fedae. Kecma ngicngac Anutu ngadehema kecdae, yeni yeac yoacfu turungngina mema manganegecde, naso imohai bangec nga wiac sawau fedacde, imoc gerecngo dzedarude.

<sup>8</sup> Songo tosofocna, ngeni ine wiac mocgu yomocac mi nigecongubeso, Kebuac negen negennu uameme mocgu imoc kifa wan tauseng, ifi isoc. Nga kifa wan tauseng, imoc uameme mocgu, ifi isoc.

<sup>9</sup> Kebungo haudaec deecmoc, ye dafi amma tondzera ande, ngic goango ifi deandae. Nga ifi kpac, imoc ine yofiac, ngicngac ngeni hofeu kemegecdeac songea mi angkecde. Ngeni ubamereng anggecdeac ye modzotitia kpac naso ngemmemma tomaingina kecde.

<sup>10</sup> Nga Kebuac hahanaso, imoc hamangec ngicngo haandae, ifi isoc haude. Naso imohai sawau wiac sasawa fedacde, imoc gerecngo yonohodarude nga sawango udumengtoagoc aockema kpac andarude. Amma bangec nga wiac sasawa maringo memea imocac witiau fede, imoc monggoc mi feude.

<sup>11-12</sup> Ifi anu wiac sasawa sawau fekendacde, imoc gerecngo yonohodaru sisingaima gagubang



amma kpac andarude. Imocac amma ngeni kekecngina garenggema kpetiac kecma Anutuac yoac hoanggema eweheimima kecbisia. Ifi kecmagec yeac nasotoa haudeac singa mema imocac tomai kecbisia.

<sup>13</sup> Anu bangec nga sawa gboria, imohai faka nga angammeme dindingac feude, imoc ngade fingerudeac deec, nenang imocac tomai kecdimbe.

<sup>14</sup> Songo tosofocna, ngeni imocac tomai kecma Anutuaru hama yegoc ruaeu uba mocgu kecgecdeac ngeni kpetiac nga kongaha kekecac tembus tembus ngombongemema kembisia.

<sup>15</sup> Nga ngeni komoc kpegecdeac Kebuninango modzotitia kpac uaya mekecde, ngeni imoc negensibisia. Nga negen negentegec imoc Anutungo songo tosonina Pauro miec, ye imoc modacma yoac imocnoc negensima kibi ohongemmeu osogec.

<sup>16</sup> Nga yeng kibi sasawa ohoec, imohai yoac yoc ohongemmeduae, imoc momoc dekperagiande. Amma yoac goa ohoec, imoc ngicngac goango negentegecgecdeac siriha kpac. Nga ngicngac goa mitiu mi heiserima negen negentegecngina kpac kecdae, yeneng yoac imoc mereng kpereng dema kecdae, imoc yeni yenaoc memanganeemema kpac anggecde. Amma mitikibiu yoac fede, yeni imoc momoc mereng kpereng deandae.

<sup>17</sup> Songo tosofocna, ngeni imoc bic negendae, imocac singyoac kpeandae, yeneng wangepngunugec tiposockema mangunubacac ngeni garengemema kecbisia.

<sup>18</sup> Nga ngeni Kebu memengerecnina Yesu Kristo yeac danggunuc nga negen negengtoa imohai

yadiseri ambisia. Ye yaguc nga nasoya kpac den-  
gerebesonga, imoc fora.

**Yoac kekehagocac Dzadzahac gboria nga  
Mitiyegec  
The New Testament and Psalms in the Dedua  
Language of Papua New Guinea  
Buk Baibel long tokples Dedua long Niugini**

copyright © 2005 Wycliffe Bible Translators, Inc.

© 2012 Wycliffe Bible Translators, Inc.

Language: Dedua

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 18 Apr 2025 from source files dated 31 Aug 2023

19b7c48c-f4ce-5007-838d-58f01dc01ecc